

DESPUES DI TRES AÑA LARGO AINDA MINISTRO NICOLAAS

NO POR A SOLUCIONA E PROBLEMA DI AEROPUERTO

ORANJESTAD(AAN) -- Tico Croes a duna di conoce na DIARIO cu ayera a sigui cu tratamiento di presupuesto y tabata Ministro Nicolaas cu mester a contesta Parlamento encuan to su maneho.

Croes a remarca cu ya caba den correspondencia entre Parlamento y Ministro Nicolaas, AVP a ripara cu Ministro Nicolaas a keda debe un cantidad di contesta di preguntanan haci y tambe el a referi na 4 of 5 ocasion cu e puntonan cu a puntre pa papia riba, e lo bin den debate publico pa papia ariba nan.

Por ehempel problemanan organisatorio, problema cu e director, problema tocante e asunto di privatisacion, etc.

AVP ta mira cu esaki ta un tendencia di Gobierno, pasobra sigur pa mas di diez biaha caba den e tratamiento di 3 presupuesto cu Gobierno ta nenga di duna contestanan concreto na Parlamento den su correspondencia.

Pero ariba e asunto di actitud mes di Ministro Nico-

laas, por ripara cu ayera mainta den su contestacion atrobe el a bolbe keda sin contesta un cantidad di preguntanan cu AVP a haci.

Por ehempel ariba e asunto di privatisacion den su correspondencia el a informa Parlamento cu e lo papia ariba dje ampliamente den e debate publico y ayera mainta kico a tende? A tende for di dje cu na un otro ocasion e lo papia ariba.

Croes a indica cu ariba e problema organisatorio, personal y e problema cu e director tambe el a bisa cu e lo papia na un otro ocasion y awor atrobe e no a papia ariba esaki.

Croes ta haya e actitud aki di stroba Parlamento di haci su trabao ta condenable y mester censura esaki energicamente. Ya caba Parlamento a manda un mensahe bon cla pa Ministro di Finanzas kende faltanto respet pa Parlamento, simplemente a lubida di manda un presupuesto di WEB.

Pero pa bay mas en con-



creto riba e asunto di aeropuerto mes, hopi ta e criticanan tanto den medionan di comunicacion como den debate publico di Parlamento tocante e estado di aeropuerto.

E aeropuerto ta sushi, e servicio ta malo, aeropuerto ta formando un bottle-neck pa e industria turistico y asina e ta strobando den e forma cu e ta.

Ta conoci cu por ehempel cu American Airlines a dicidi di baha su asientonan debi cu e no tin e facilidadnan necesario pa por atende su pasaheronan.

Ademas AVP a tende cu ainda Gobierno no a haci e preparacionnan necesario pa bay adapta e aeropuerto di Aruba pa e facilidad di pre-clearance, esta duana Mericano.

Ta conoci cu bao di e Gobierno anterior di Gabinete Eman a trece inmigracion Mericano Aruba y e plannan

tabata cla caba pa trece duana Mericano Aruba.

A dura tres aña promer cu porfin a haya informacion cu duana Mericano ta biniendo Aruba, pero awor AVP a compronde for di Ministro Nicolaas cu ta aworaki numa ta bay sinta combersa con ta bay crea facilidadnan pa duana Mericano bin.

Kiermeen, manera Ministro Nicolaas a contesta ta parce cu e Ministro ta keriendo cu e ta den su promer aña di gobernacion y no den su ultimo aña di gobernacion.

Segun Croes, Ministro Nicolaas ta papiando di estudionan y di discusionnan. E ta papiando cu e lo mester bay papia cu un cantidad di hende, pero Gobierno no ta bin concretamente kico nan ta bay haci pa soluciona e problemanan.

Riba e asunto di inversion por ehempel, AVP por ripara cu dia 10 di Augustus 1991 Promer Ministro Nel Oduber a informa cu el a yega na un acuerdo cu Hulanda, cu Aruba lo haya 50 % di finan-

ciamento pa aeropuerto como regalo y e otro 50 % e lo haya na un interes di 2 y mey porciento pa aña y page bek den 30 aña.

Despues di dos siman a tende riba e mesun asunto aki for di boca di Promer Ministro cu no ta asina, pero cu awor Hulanda ta exigiendo pa aeropuerto bira un N.V. y cu ademas Gobierno di Aruba mes mester bay busca 50 % di e financiamiento riba mercado di capital.

Esakinan ta e informacionnan bruha cu ta confundi henter e asunto di aeropuerto y ayera a spera cu Ministro Nicolaas lo a trece claridad ariba e asunto aki pero kico el a splica? Cu simplemente awor numa e ta den discusionnan cu conseheronan y no tin nada concreto.

Croes ta haya cu e actualcion di Ministro Nicolaas no solamente ta condenable pero tambe e ta un frustracion grandi cu despues di tres aña ainda Ministro Nicolaas ni Promer Ministro por a soluciona e problema di aeropuerto.